



TOSHKENT DAVLAT YURIDIK UNIVERSITETI REKTORINING B U Y R U G ' I

05.06.2023

337-tm-son

Talabalar safidan chetlashtirish to'g'risida

O'zbekiston Respublikasi Prezidentining 2020-yil 29-apreldagi "O'zbekiston Respublikasida yuridik ta'lim va fanni tubdan takomillashtirish bo'yicha qo'shimcha chora-tadbirlar to'g'risida"gi PF-5987-son Farmonining 2-bandida zamonaviy talablar, ilg'or xalqaro yuridik tajriba va mehnat bozori ehtiyojlari asosida yuqori malakali, ijodiy fikrlaydigan, halol kadrlar tayyorlashni ta'minlash yuridik ta'lim va fanni yanada rivojlantirishning ustuvor yo'nalishlaridan biri etib belgilangan.

Shuningdek, bugungi kunda universitetda zamonaviy xalqaro standartlarga javob beradigan yuqori malakali yuridik kadrlarni tayyorlash maqsadida talabalarni ma'naviy-axloqiy tarbiyalash, huquqiy madaniyati va ongini oshirish bo'yicha samarali tizimni yaratish, ularda yuksak ma'naviy-axloqiy fazilatlarni shakllantirish hamda rivojlantirish maqsadida bir qator kompleks chora-tadbirlar amalga oshirilmoqda.

Shunga qaramasdan ayrim talabalar tomonidan universitet Odob-axloq kodeksi va boshqa ichki hujjatlarni buzish holatlari kuzatilmoqda.

Jumladan, universitetning Xalqaro huquq va qiyosiy huquqshunoslik fakulteti 2021/2022 o'quv yilida 3-kurs A potok 3-guruh talabasi Dehqonov Shermuhammad Musajon o'g'li o'zining Facebook sahifasida universitet imijiga salbiy ta'sir qiladigan ma'lumotlarni hamda davlat hokimiyati va boshqaruvi organlari xodimlarini ishchanlik obro'siga salbiy ta'sir qiluvchi asossiz va tekshirilgan dalillarga asoslanmagan turli xil ko'rinishdagi ma'lumot, fikr, mulohaza va munosabatlarni Internet va ijtimoiy tarmoqlarga joylashtirgan.

Talaba Sh.Dehqonov ushbu harakatlari bilan universitet Odob-axloq kodeksining 14-moddasi ikkinchi xatboshisi (o'z harakatlarini universitet manfaatlarini ko'zlab amalga oshirish, uning imijini saqlash va oshirish, Universitet, uning xodimlari, talabalari va doktorantlari nomi va manfaatlariga ziyon yetkazadigan harakatlarni amalga oshirmaslik, shuningdek, ular bilan muloqot qilganda hamda ijtimoiy tarmoqlardagi yozishmalarida o'zlarining

namunali xulq-atvori bilan Universitet haqida yuksak ijobiy taassurot uygʻotish) 16-moddasi uchinchi qismi (davlat hokimiyati va boshqaruvi organlari va Universitet faoliyati, uning xodimlari hamda talabalari shaʼni va qadr qimmatini hamda ishchanlik obroʻsiga salbiy taʼsir qiluvchi haqiqatga toʻgʻri kelmaydigan, asossiz va tekshirilgan dalillarga asoslanmagan turli xil koʻrinishdagi maʼlumot, fikr, mulohaza va munosabatlarni Internet, ijtimoiy tarmoqlar, shuningdek, boshqa ommaviy axborot manbalarida, tarqatuvchilarda, tashuvchilarda paydo boʻlishi (oshkor etilishi)), 26-moddasi sakkizinchi, oʻn toʻrtinchi va oʻn beshinchi xatboshilarida (Universitet obroʻ-eʼtibori va nufuziga dogʻ tushiradigan har qanday harakatlarni sodir etishdan oʻzini tiyish, xodim, talaba va doktorantlar, shuningdek, boshqa shaxslar haqida turli igʻvo, fitna, gʻiybat va boʻxtonlar uyushtirmaslik va tarqatmaslik hamda universitet ishchanlik obroʻsi yoki nufuziga putur yetkazadigan nizoli vaziyatlarga yoʻl qoʻymaslik) keltirilgan qoidalarni qoʻpol ravishda buzgan.

Yuqoridagilarni inobatga olgan holda Oliy taʼlim toʻgʻrisidagi nizom (roʻyxat raqami 1222, 2003-yil 22-fevral) 51-bandi, Toshkent davlat yuridik universiteti Odob-axloq kodeksining 14, 16 hamda 26-moddasi hamda universitetning Ichki tartib qoidalari (ichki mehnat tartibi qoidalari) 83-bandiga asosan **Dehqonov Shermuhammad Musajon oʻgʻliga TDYU rektorining 2022-yil 2-iyundagi 128-tm-son buyrugʻi bilan birinchi marta hayfsan chorasi qoʻllanilgan.**

Shundan soʻng, talaba Dehqonov Shermuhammad Musajon oʻgʻli oʻz xatti-harakatlaridan tegishli xulosa chiqarmagan hamda TDYU tomonidan oʻrnatilgan ichki tartib-qoidalarni buzishni davom etgan.

Xususan, universitet rektorining 2023-yil 3-fevraldagi “Toshkent davlat yuridik universitetining bakalavriat bosqichi kunduzgi taʼlim shakli 4-bosqich talabalarining 2022/2023-oʻquv yili bahorgi semestri davomida bitiruv malakaviy amaliyotini tashkil etish toʻgʻrisida”gi 60-tm-son buyrugʻiga muvofiq Xalqaro huquq va qiyosiy huquqshunoslik fakulteti 4-kurs talabasi Dehqonov Shermuhammad Musajon oʻgʻli Oʻzbekiston Respublikasi Oliy Majlisning Inson huquqlari boʻyicha vakili (ombudsman)da amaliyot oʻtashi belgilangan. Talaba Sh.Dehqonov 2023-yil 6-fevraldan bitiruv malakaviy amaliyotini mazkur tashkilotda oʻtashni boshlagan.

Ammo, Oʻzbekiston Respublikasi Oliy Majlisning Inson huquqlari boʻyicha vakili (ombudsman) kotibiyatining 2023-yil 27-fevraldagi 03-07/156-son xatiga muvofiq talaba Sh.Dehqonov amaliyot oʻtash davrida oʻzining shaxsiy manfaatida Buxoro viloyati hokimligining masʼul xodimlariga telefon orqali murojaat qilib, oʻzini “Ombudsman xodimi” deb tanishtirgani hamda ularga bosim oʻtkazishga harakat qilgani, Buxoro viloyati hokimligi tomonidan talaba Sh.Dehqonov va masʼul xodim oʻrtasidagi suhbat Ombudsman Kotibiyatiga maʼlum qilinib, audio

yozuv taqdim etilgani, mazkur holatdan kelib chiqib, talaba Sh.Dehqonovning Ombudsman Kotibiyatida bitiruv malakaviy amaliyotini o'tashi maqsadga muvofiq emasligi qayd etilgan.

Talaba Dehqonov Shermuhammad Musajon o'g'li mazkur harakatlari bo'yicha o'z tushuntirish xatida Buxoro viloyati hokimligining mas'ul xodimi M.Yarashevga telefon orqali o'zini "xodim" deb tanishtirgani hamda 22-Mehribonlik uyida tarbiyalangan talaba B.Ibragimovga uy-joy ajratish bo'yicha murojaat qilganini qayd etdi.

Talaba mazkur harakatlari bilan "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizomning (ro'yxat raqami 2548) 164-bandiga muvofiq talaba bitiruv malakaviy amaliyotni o'tashda qabul qiluvchi tashkilotning ichki mehnat tartib qoidalari va xodimlari faoliyatining tartibini belgilovchi hujjatlarga rioya qilishi shartligi belgilangan qoidalarga, shunindek universitet Odoab-axloq kodeksi 26-moddasining tegishli qismlari (talaba Universitet obro'-e'tibori va nufuziga dog' tushiradigan har qanday harakatlarni sodir etishdan o'zini tiyishga; Universitet ishchanlik obro'si yoki nufuziga putur yetkazadigan nizoli vaziyatlarga yo'l qo'ymaslikka va shaxsiy foydasi hamda o'zgalar manfaatini ko'zlab o'z mavqeini suiiste'mol qilmaslikka majbur) talablarini buzgan.

Yuqoridagilarni inobatga olgan holda Oliy ta'lim to'g'risidagi nizom (ro'yxat raqami 1222, 2003-yil 22-fevral) 51-bandi, "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizomning (ro'yxat raqami 2548) 164-bandi, Toshkent davlat yuridik universiteti Odoab-axloq kodeksining 18-modda ikkinchi qismi, 26-moddasining tegishli qismlari hamda universitetning Ichki tartib qoidalari (ichki mehnat tartibi qoidalari) 83-bandiga asosan **Dehqonov Shermuhammad Musajon o'g'liga TDYU rektorining 2023-yil 24-martdagi 164-tm-son buyrug'i bilan ikkinchi marta hayfsan chorasi qo'llanilgan.**

Shundan so'ng ham, talaba Dehqonov Shermuhammad Musajon o'g'li o'z xatti-harakatlaridan tegishli xulosa chiqarmagan hamda TDYU tomonidan o'rnatilgan ichki tartib-qoidalarini buzishni davom etgan.

Xususan, universitet rektorining 2023-yil 3-fevraldagi "Toshkent davlat yuridik universitetining bakalavriat bosqichi kunduzgi ta'lim shakli 4-bosqich talabalarining 2022/2023-o'quv yili bahorgi semestri davomida bitiruv malakaviy amaliyotini tashkil etish to'g'risida"gi 60-tm-son buyrug'iga muvofiq Xalqaro huquq va qiyosiy huquqshunoslik fakulteti 4-kurs talabalari 2023-yilning 6-fevralidan 14-apreliga qadar bitiruv malakaviy amaliyot o'tashi belgilangan.

Shuningdek, Universitet rektorining 2023-yil 11-martdagi 142-tm-son

buyrug'i bilan Universitet rektorining 2023-yil 3-fevraldagi 60-tm-son buyrug'iga tegishli o'zgartirish kiritilgan.

Shuningdek, universitet rektorining mazkur 60-tm-son buyrug'iga muvofiq bitiruv malakaviy amaliyot rahbarlari talabalarning amaliyot o'tashlarini, ularning amaliyot hisobotlarini o'rnatilgan tartibda rasmiylashtirilishini nazorat qilib, amalga oshirilgan ishlar yuzasidan haftalik ma'lumotlarni O'quv-uslubiy boshqarma Bandlik bo'limiga taqdim etib borish belgilangan.

Bundan tashqari, "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizamning (ro'yxat raqami 2548) 164-bandiga muvofiq talaba bitiruv malakaviy amaliyotni o'tashda bitiruv malakaviy amaliyotni o'tash dasturida nazarda tutilgan barcha topshiriqlarni belgilangan muddatlarda, to'liq hajmda va sifatli bajarishi hamda OTMdan biriktirilgan bitiruv malakaviy amaliyot rahbarining talabi bilan ko'rib chiqish uchun bitiruv malakaviy amaliyotni o'tash to'g'risidagi hisobotini taqdim qilishi shartligi belgilangan.

Ammo, Xalqaro huquq va qiyosiy huquqshunoslik fakultetining ilovada keltirilgan 4-kurs talabalari (mazkur ilovada Dehqonov Shermuhammad Musajon o'g'li ham mavjud) belgilangan tartibda bitiruv malakaviy amaliyot hisobotlarini o'z vaqtida taqdim qilmagan hamda mazkur holat bo'yicha TDYUdagi amaliyot rahbarlari tomonidan tegishli tartibda bildirgi kiritilgan.

Xalqaro huquq va qiyosiy huquqshunoslik fakultetining ilovada keltirilgan 4-kurs talabalari mazkur holat bo'yicha o'z tushuntirish xatlarida haqiqatdan ham amaliyot hisobotlarini o'z vaqtida taqdim qilmaganliklarini tasdiqlashdi.

Xalqaro huquq va qiyosiy huquqshunoslik fakultetining ilovada keltirilgan 4-kurs talabalari mazkur harakatlari bilan Universitet rektorining 2023-yil 3-fevraldagi "Toshkent davlat yuridik universitetining bakalavriat bosqichi kunduzgi ta'lim shakli 4-bosqich talabalarining 2022/2023-o'quv yili bahorgi semestri davomida bitiruv malakaviy amaliyotini tashkil etish to'g'risida"gi 60-tm-son buyrug'i, "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizamning (ro'yxat raqami 2548) 164-bandiga muvofiq bitiruv malakaviy amaliyotni o'tash dasturida nazarda tutilgan barcha topshiriqlarni belgilangan muddatlarda, to'liq hajmda va sifatli bajarishi, universitetdan biriktirilgan bitiruv malakaviy amaliyot rahbarining talabi bilan ko'rib chiqish uchun bitiruv malakaviy amaliyotni o'tash to'g'risidagi hisobotini taqdim qilishi, shuningdek Toshkent davlat yuridik universiteti Odob-axloq kodeksining 5-moddasi Universitet xodim, talaba va doktorantlari O'zbekiston Respublikasi qonunchiligiga so'zsiz rioya qiladilar hamda o'z xizmat va o'qish majburiyatlarini lavozim yo'riqnomalari, mehnat shartnomalari TDYU

Odob-axloq kodeksi qoidalari, Universitet Ichki tartib qoidalari hamda ta'limga oid boshqa me'yoriy hujjatlarga muvofiq bajarishiga oid talablarini buzgan.

Yuqoridagilarni inobatga olgan holda Oliy ta'lim to'g'risidagi nizom (ro'yxat raqami 1222, 2003-yil 22-fevral) 51-bandi, Universitet rektorining 2023-yil 3-fevraldagi 60-tm-son buyrug'i, "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizomning (ro'yxat raqami 2548) 164-bandi, Toshkent davlat yuridik universiteti Odob-axloq kodeksining 5-moddasi hamda universitetning Ichki tartib qoidalari (ichki mehnat tartibi qoidalari) 83-bandiga asosan **Dehqonov Shermuhammad Musajon o'g'liga TDYU rektorining 2023-yil 12-apreldagi 215-tm-son buyrug'i bilan uchinchi marta hayfsan chorasi qo'llanilgan.**

Shundan so'ng ham, talaba Dehqonov Shermuhammad Musajon o'g'li o'z xatti-harakatlaridan tegishli xulosa chiqarmagan hamda TDYU tomonidan o'rnatilgan ichki tartib-qoidalarini buzishni davom etgan.

Yana takror Xalqaro huquq va qiyosiy huquqshunoslik fakultetining ilovada keltirilgan 4-kurs talabalari (mazkur ilovada Dehqonov Shermuhammad Musajon o'g'li ham mavjud) belgilangan tartibda bitiruv malakaviy amaliyot hisobotlarini o'z vaqtida taqdim qilmagan hamda mazkur holat bo'yicha TDYUdagi amaliyot rahbarlari tomonidan tegishli tartibda bildirgi kiritilgan hamda Oliy ta'lim to'g'risidagi nizom (ro'yxat raqami 1222, 2003-yil 22-fevral) 51-bandi, Universitet rektorining 2023-yil 3-fevraldagi 60-tm-son (132 va 142-tm-son) buyruqlari, "Yuridik ta'lim muassasalari (harbiy, maxsus oliy ta'lim muassasalaridan tashqari) talabalari tomonidan tanishtiruv va bitiruv malakaviy amaliyotni, shuningdek stajirovkani o'tash tartibi to'g'risida"gi nizomning (ro'yxat raqami 2548) 164-bandi, Toshkent davlat yuridik universiteti Odob-axloq kodeksining 5-moddasi hamda universitetning Ichki tartib qoidalari (ichki mehnat tartibi qoidalari) 83-bandiga asosan **Dehqonov Shermuhammad Musajon o'g'liga TDYU rektorining 2023-yil 2-maydagi 259-tm-son buyrug'i bilan to'rtinchi marta hayfsan chorasi qo'llanilgan.**

Shundan so'ng ham, talaba Dehqonov Shermuhammad Musajon o'g'li o'z xatti-harakatlaridan tegishli xulosa chiqarmagan hamda TDYU tomonidan o'rnatilgan ichki tartib-qoidalarini buzishni davom etgan.

Xususan, diplomoldi amaliyot hisobotlarini topshirmagan hamda kech topshirgan Xalqaro huquq va qiyosiy huquqshunoslik fakultetining bir guruh talabalariga Universitet rektorining 2023-yil 2-maydagi 259-tm-son buyrug'i bilan hayfsan e'lon qilingan va mazkur buyruq ilovasida Dehqonov Shermuhammad Musajon o'g'li ham mavjud bo'lib, mazkur rektor buyruq mazmuni bilan talabalarni tanishtirish uchun 2023-yil 3-mayda Xalqaro huquq va qiyosiy huquqshunoslik fakulteti 4-kurs bitiruvchilar uchun ochilgan "XHQH fakulteti

2022-2023 bitiruvchilari” nomli telegram guruhga mazkur buyruq va ilovalari tarqatilgan.

Mazkur buyruq mazmuni bilan tanishib chiqqan, Dehqonov Shermuhammad Musajon o‘g‘li 400 nafarga yaqin 4-kurs a‘zolaridan iborat bo‘lgan “XHQH fakulteti 2022-2023 bitiruvchilari” nomli telegram guruhda “Eng nomard dekanat Xalqaro bo‘ladi”, “Dekan ayol kishi bo‘lsa zamdekanlar erkakku. Ha mayli harakteram boshqaruvga bog‘lanib qolyaptimi deyman”, “Tanishmimanam bormimanam. Nizomda oy oxirida platformaga yuklanadi degan. O‘z vaqtida Yuklab qutulganman. Har hafta amaliyot rahbariga berasan degan rektor buyrug‘i bilan hech qaysin tanishtirmagansan. Xabarim ham bo‘lmagan”. “Sizi ichki qonunuzda yuklash aytilgan o‘z vaqtida yuklanganman. Sanlar qasdma qasdiga ish qilyabsan. Hech qanaqa qonuniylik yo‘q. Kamerada ko‘tarib keyin qo‘l qo‘yib berdi. Man bu hayfsanlarini asossiz deb topaman. Ma‘naviy bosim qilib tinch o‘qishimga qo‘ymayotganlarin uchun sudga beraman”. “O‘rganmasdan hayfsan chiqarishganin man uchun nomardlik. Klinika kegan kunlaringa qo‘l qo‘ydi xisobot isbot bo‘ladi indamasa boshga chiqishasan”. “O‘zlarin o‘tkiz o‘sha komisiyeni” “Asossizligini isbotleman oxrigacha boraman bu safar. Qo‘rqadigan yo‘qotadigan narsam yo‘q” mazmunida haqoratli jumlalarni fakultet xodimlariga nisbatan ishlatgan.

Shundan so‘ng, talaba Dehqonov Shermuhammad Musajon o‘g‘li Xalqaro huquq va qiyosiy huquqshunoslik fakulteti dekanatiga chaqirtirilib mazkur harakatlari bo‘yicha tushuntirish xati yozish so‘ralganda, tushuntirish xati yozishdan bosh tortgan hamda holat yuzasidan dalolatnoma tuzilgan.

Talaba mazkur harakatlari bilan universitet Odob-axloq kodeksi

14-moddasining ikkinchi qismi (talaba universitet va uning xodimlari nomi va manfaatlariga ziyon yetkazadigan harakatlarini amalga oshirmaslik, shuningdek ular bilan muloqot qilganda hamda ijtimoiy tarmoqlaridagi o‘zlarining namunali xulq-atvori bilan Universitet haqida yuksak ijobiy taassurot uyg‘otish lozim) va 18-moddasining ikkinchi qismi (xodim, talaba va doktorantlarning o‘zaro munosabatlarida inson qadr-qimmatiga hurmatsizlik, shaxsiyatni kamsitish, o‘zganing intellektual mulkini o‘zlashtirib olish, qo‘pollik, behayo so‘zlar ishlatish, mushtlashish qat’iyan man etiladi) talablarini buzgan.

Yuqoridagilarni inobatga olgan holda Oliy ta’lim to‘g‘risidagi nizom (ro‘yxat raqami 1222, 2003-yil 22-fevral) 51-bandi, Toshkent davlat yuridik universiteti Odob-axloq kodeksining 14,18-moddalari ikkinchi qismi hamda universitetning Ichki tartib qoidalari (ichki mehnat tartibi qoidalari) 83-bandiga asosan **Dehqonov Shermuhammad Musajon o‘g‘liga TDYU rektorining 2023-yil 1-iyundagi 333-tm-son buyrug‘i bilan beshinchi marta hayfsan chorasi qo‘llanilgan.**

O‘zbekiston Respublikasi Vazirlar Mahkamasining 2017-yil 20-iyundagi

393-son qarori bilan tasdiqlangan Oliy ta'lim muassasalari talabalari o'qishini ko'chirish, qayta tiklash va o'qishdan chetlashtirish tartibi to'g'risidagi nizomning 36-bandining g-kichik bandi (talaba oliy ta'lim muassasasidan o'quv intizomini va oliy ta'lim muassasasining ichki tartib-qoidalarini hamda odob-axloq qoidalarini buzganligi uchun chetlashtirilishi mumkin), O'zbekiston Respublikasi Vazirlar Mahkamasining 2021-yil 10-iyundagi "O'zbekiston Respublikasi adliya vazirligi tizimidagi ta'lim muassasalarida kredit-modul tizimini joriy etish chora-tadbirlari to'g'risida"gi 359-son qarori bilan tasdiqlangan Toshkent davlat yuridik universitetida ta'limning kredit-modul tizimida o'quv jarayonini tashkil etish tartibi to'g'risidagi nizomning 43-bandining 3-xatboshisi (talabalar TDYUdan o'quv intizomini va TDYU tomonidan o'rnatilgan ichki tartib-qoidalarini muntazam ravishda yoki bir marotaba qo'pol ravishda buzganligi uchun chetlashtiriladi), Oliy ta'lim to'g'risidagi nizom (ro'yxat raqami 1222, 2003-yil 22-fevral) 51-band, Odob-axloq kodeksining 5, 14, 16, 18, 26-moddalari hamda universitetning Ichki tartib qoidalarini (ichki mehnat tartibi qoidalarini) 83-bandiga (mazkur Qoidalar, universitet Odob-axloq kodeksi, universitetning korrupsiyaga qarshi kurashish dasturi (siyosati), universitet xodim, talaba, abituriyent va doktorantlari tomonidan korrupsiyaviy huquqbuzarliklar sodir etishga og'dirish maqsadida murojaat qilish holatlari haqida xabardor qilish to'g'risidagi nizom, universitet Ustavi, universitet Kengashi qarorlari, rektor buyruqlari, lavozim yo'riqnomasi, tarkibiy bo'linmalar to'g'risidagi nizomlar va boshqa ichki normativ hujjatlarda belgilangan talablarni buzganligi uchun talaba va abituriyentlarga universitetdan chetlashtirish ta'sir choralari qo'llaniladi. Intizomiy jazo choralari nojo'ya xatti-harakat aniqlangandan keyin bir oy ichida, sodir etilgan kundan boshlab olti oy ichida talaba (doktorant)ning kasal yoki ta'tilda bo'lgan vaqtini hisobga olmagan holda qo'llaniladi) asosan

BUYURAMAN

1. Xalqaro huquq va qiyosiy huquqshunoslik fakultetida davlat granti asosida tahsil oluvchi 4-kurs talabasi Dehqonov Shermuhammad Musajon o'g'li "Toshkent davlat yuridik universitetida ta'limning kredit-modul tizimida o'quv jarayonini tashkil etish tartibi to'g'risida"gi nizomning 43-bandiga muvofiq o'quv intizomini va TDYU tomonidan o'rnatilgan ichki tartib-qoidalarini muntazam ravishda yoki bir marotaba qo'pol ravishda buzganligi uchun **talabalar safidan chetlashtirilsin**.

2. Ma'naviyat va ma'rifat markazi (Sh.Po'lotov) fakultet dekanlari bilan birgalikda mazkur buyruq mazmun-mohiyatini talabalar e'tiboriga yetkazilishi hamda kelgusida shu kabi holatlar talabalar tomonidan sodir etilmasligi va talabalarga universitetda belgilangan tartib-qoidalarga rioya etish masalasi har bir akademik guruhda keng muhokama qilinishini ta'minlasin.

3.Xalqaro huquq va qiyosiy huquqshunoslik fakulteti dekani (D.Umarxanova) mazkur talabalarining shaxsiy hujjatlar yig'majildiga buyruq nusxasi tikilishini ta'minlasin.

4.Mazkur buyruq ijrosini nazorat qilishni o'z zimmamda qoldiraman.

Rektor v.v.b.



I.RUSTAMBEKOV

Toshkent shahar

Kiritildi:

Dekan (fan doktori yoki fan doktori
(Doctor of Science) ilmiy darajasiga
yoki xorijiy davlatlarning unga
tenglashtirilgan boshqa ilmiy
darajalariga yoki professor ilmiy
unvoniga ega bo'lgan)

D.UMARXANOVA



Kelishildi:

Yoshlar masalalari va ma'naviy-
ma'rifiy ishlar bo'yicha birinchi
prorektor

A.XASHIMHONOV



Direktor

SH.PO'LOTOV



Boshqarma boshlig'i

S.BOZAROV



Bosh buxgalter

M.PARPIYEV



Katta yuriskonsult

A.TURSUNOV

